

La-ukei ta Pol atorou ili tiri lau badu kon GALESIYA

Sahou Tanan

Iri lau ma mwena a-en hamon ta Jises badeh, iri le Juwis amwenen. Arile udu hamon ja, Jises eme suni aposel Pol ili ta atiye sahou mwasin ili tiri lau mwan ma badih badu bolo kon rakon ja ale. Eme ma, udu bolo len doh, iri lau solo-an ale ame a-en hamon ta Jises, ma lakou ari maha-an asahan. Bwena mene iri lau doh ba-en hamon ta batanau ta Moses, bala buku iri Juwis amekes bwe. Na len iri asahan lau ta Kindrei, iri ale ka-en hamon ta iri batanau ta Moses, o bwe?

Lau rayah badeh, anya katiye iri lau nane doh kasan ku-i iri ta kandriyen tiri Juwis, ma ka-en hamon tiri batanau rayah ta Moses. Arile Pol anya bwe. Iy anya, taha katehei budon tataha kili le ta Jises Kraiss, ma idoh le kameh winiyan bwidi taha asahan lau mwasin handru ta mada Kindrei, ma taha akohok koha taha ha-un.

Nyolom ta aliy i buku iri Juwis rayah nane doh mene ndralla loboho kon tinan Galesiya, ma iri anya kanone kamekes iri lau ta Kindrei ka-en hamon ta iri batanau ta Moses. Pol anuhun sahou ta lakou doh asahan, iy eme torowenei la-ukei dah ili tiri Galesiya ta amekes budon ma kandriyen tiri kudu mwasin ja.

Ma bwena badeh, Pol asehek i buku doh: Kindrei le amwenen atehei iy ta amekes gok buku aposel. Iy ba-en ta budon tan amwenen le bwe, ma iy ale ba-en hamon ta sahou ta ndrarak ari le bwe. Kindrei mene aloh iy, ma atehei gok i tan ta atiye sahou mwasin ili tiri lau tana iri Kindrei bwe. Udu ja, Pol asehek i buku doh: Iri lau atehei budon tiri handru in ta Jises Kraiss, iri le winiyan asahan lau mwasin ta are mada Kindrei. Sahou ta la-ukei dah anya kano, i buku doh: Kraiss mene amekes taha ame len asahan mwasin; Malawin Ndrabun badeh, edek in mwena ta leheya san tataha, ma taha winiyan amekes kandriyen mwasin ili tiri lau rayah ja.

Iri Sahou Tinan

Aposel handru ma sahou tan handru (1:1-10)

Kindrei atehei Pol asahan aposel (1:11-24)

Pol ales boto-on ta sahou tan (2:1-21)

San ari le ta ou bwalem amak, badeh, budon le (3:1-4:31)

Malawin Ndrabun ta tikisiy in mwena tataha (5:1-6:10)

Batanau boto-on (6:11-18)

Kindrei amwenen badeh, tiye Pol ta amekes gok aposel

(Kalan 1:1-2:14)

Sahou sekese ta Pol

1¹⁻²Jo Pol: Jo badeh, aposel tiri lau ta Kindrei. Jo atorou la-ukei dah ewek taha lau mwan ma badih ta Kindrei ale are bolo kon munyak tinan Galesiya. Iri lau nane ahi amekes lahou se badeh, ale are hawek, ma iri ale anya, bada-an mwasin tiri ewek taha. Jo aposel ari, eme ma jo badeh, edek ma atiye sahou ta Kindrei. Idoh badeh, basahan na seken ta ari ndramak, bwe. Idoh badeh, asahan na seken ta Jises Krai hasawe taman Kindrei le amwenen. Uru le amwenen badeh, atehei gok dah eme tek ma suni jo ta atiye sahou mwasin ewek taha. Jises mene imek, arile Kindrei ndrmete-ei iy udu ta imek tan badeh, ndrmete awas ja.

³Jo anya kedeu bada-an mwasin kewek taha ale. Tikisiy ma mondrei ta tama taha Kindrei hawe Laban tataha Jises Krai ewek taha. ⁴Kindrei mene suni Jises eme andri kon munyak, iy le amwenen imek ta sikine karei ma lomondra ndra-in tataha. Iy bwalen iri kandriyen ndra-in badu munyak dah kabokoro-ei taha. Eme ma, iy eme dah badeh, ta aseben taha, ta iri kandriyen doh kameh winiyan baluwi taha bwe. Idoh, in hamon ta seken ta tama taha Kindrei le. ⁵Iy badeh, udu bwele-en labai tiri lakou mara-ei. Boto-on tan hawe lomadan badeh, winiyan bano bwe. Eme ma taha kamasiye ma katudun iy kudu le buku doh! Handru.

Sahou mwasin ari le ta Krai badeh, udu kede-en ai

⁶Aden! Manik badeh, atur labai ta kandriyen aha amekes. Tasah, aha badeh, a-en hamon ta kandriyen mwasin ta Jises nane dah, ma se nawin bwe, aha anya karuwani Kindrei, ta a-en hamon ta kandriyen randrah ja. Ta tikisiy ta Krai le badeh, Kindrei luhi aha ame asahan lau tan. Arile, kandriyen nane aha abudon ta a-en hamon ta aliy badeh, bado se hawe sahou mwasin tan handru bwe. ⁷Ya, kandriyen ha-un nane badeh, mwasin handru bwe. Kandriyen ari le doh badeh, mwasin mara-ei. Idoh badeh, kandriyen ta Krai. Iri lau nane ndrasahan hawe aha badeh, iri anya katobolowe kandriyen ta Krai kasahan randrah ja. Ma iri ale anya kabolowa budon ma manyah taha sasahan samwenen. ⁸Sahou mwasin ta Krai doh badeh, aso mene leheyani aha ta aliy badeh, mwasin labai. Eme ya, ki buku none aso deh, bwe-em, ari angelo badu kandrah,

karuwani sahou mwasin ta Krai doh, ma katiye sahou mwasin ki randrah labai ja, ta aha sa-en hamon ta sahou mene aso atiye dah, badeh, jo aseken ta iy ndrarak doh badeh, kakohok maha-an hawe sisi-in ndrakin, ta udu le buku doh! ⁹Aso mene ndrasedek ndra-au, ya, na dah badeh, jo anya kasedek ja: Ki buku are lau katiye sahou randrah ja, ta sahou mwasin ta Krai mene aha ndraranuhun badeh, jo aso-ok iy ndrarak doh badeh, kakohok maha-an ma sisi-in ndra-in labai kudu le buku doh!

¹⁰Jo babudon solo-an ta budon tiri mwan ma badih bwe. Buku iri baso-ok jo bwe, jo ari sahou ta aliy bwe le. Jo ndrarak ari ta atiye sahou handru, ma jo aso-ok Kindrei le amwenen kasedek ta gok tek. Buku iri batedek ta sahou nane jo asedek bwe, ndraki-iy ai. Buku jo ndrarak ari ta atamar le iri lau, jo winiyan basahan lohowan ta Krai bwe.

Kundruh ta Pol asahan lau ta Kindrei

¹¹Aha nadu tine, jo anya katiye kamwenen ki taha, ta aha katanan ta sahou mwasin jo atiye mene ewek taha badeh, basahan ta budon ta ari ndrarak bwe. ¹²Jo badeh, bakohok ma banuhun sahou mwasin dah badu boho ari ndrarak bwe. Ma ari ndrarak baleheya sahou mwasin dah bame tek bwe. Jises Krai le amwenen badeh, leheyani jo ta iri sahou mwasin mara-ei doh.

¹³Aha mene ndraranuhun ma ndratanan kandriyen ta bolo tekedek tek ma loweu udu bolo iri Juwis. Jo badeh, in hamon ta kandriyen tiri. Jo udu buku doh badeh, ma jo baso-ok iri lau ta Kindrei bwe. Ma jo anya kidi iri lau ta Kindrei kamak kano ka-au. ¹⁴Ya, oro Juwis rebesem badu hawek badeh, jo sakalau oro ja ta kandriyen ta batanau. Jo sakalau oro ta bolo kandriyen ta tubu ahi, iri asedek eme tahi Juwis. Ma eme, budon tek irih labai ta in hamon ta kandriyen ta tubu ahi iri.

¹⁵Jo badeh, in hamon ta kandriyen doh, arile Kindrei baso-ok lakou doh bwe. Arile, jo basahan bwe le, Kindrei badeh, ndratanan jo ai, ma iy ndrasedek jo ta amekes lahou tan. Eme ma, na tikisiy tan le badeh, iy atehi jo amekes lahou tan. ¹⁶Iy le amwenen leheyani nadun asahan eme madak, ta jo kameh katiye sahou tan mwasin kili tiri lau badu leheleh. Ya jo bala hawe ari ndrarak bakohok tanan tan bwe. ¹⁷Oro aposel ado Jerusalem badeh, bwena tek labai. Arile, jo bala hawe oro bakohok tanan toro bwe. Jo badeh, ili kon ari doh, lau solo-an bado aliy bwe, iri aloh Arabiya. Jo ili ere aliy ano badeh, jo eme hamon eme kon tinan Damaskus. ¹⁸Udu bolo jaha ma taloh ano badeh, jo ili kon tinan Jerusalem ta atou aposel ari, nyaran Pita.^a Jo udu hawen badeh, len ma ronoh limeh (15) le. ¹⁹Jo badeh, batou oro aposel marakon bwe. Jo badeh, atou le Pita hawe Jemis, nadu tine Laban tataha Jises.

^a (1:18) Udu bolo la-ukei dah Pol aloh Pita Sepas. Idoh nyaran i boho kon tiri Aramek.

²⁰Sahou marakon jo atorou ewek taha dah badeh, ndra handru le ai. Jo bawendreyaya aha bwe. Kindrei tanan saba lakou jo asehek. ²¹Ano jo udu Jerusalem iu ili loboho munyak tinan Siriya hawe Silisiya. ²²Na len doh, iri lau ta Kindrei badu Judiya bala tanan jo bwe le. ²³Arile, iri anuhun le, lau asehek anya, “Iy ndrarak mene ta idi taha. Arile, nadah ja badeh, iy ndraruwani kandriyen ndra-in doh ndra-au. Bwena badeh, iy bwalen labai ta sahou mwasin ta Kraiss, arile, nadah ja badeh, iy ndratiye ndralla ta lau ja ai.” ²⁴Eme ma, iri sekese ma atudun nyara Kindrei. Tasah, jo badeh, ndra-en hamon ta Jises.

Pol ili hawe iri aposel ado Jerusalem

2 ¹Ano, hamon ta jaha ma ronoh hahuw (14) ano badeh, jo hawe Banabas uru Taitus, aso ma taloh au ala hamon ala Jerusalem. ²Kindrei asehek sahou eme tek, i san ta ameh, eme ma jo ili. Aso ala asahan Jerusalem, ano jo ili atukum hawe iri lau ta mwena tiri lau ta Kindrei. Jo batukum hawe iri lau mari bwe. Jo atukum hawe iri lau ta mwena le tiri. Jo asehek tiri le ta sahou mwasin jo mene ndrasedhek tiri mwan ma badih badu leheleh. Jo badeh, abudon i buku doh: “Kora-on iri basekese ta sahou jo asehek dah bwe, ma iri gok jo amekes dah kameh iu laleyah.” Eme ma jo asehek nyala iri. ³Ya Taitus badeh, udu hawek na len doh. Iy badu Grik, arile iri lau mene ta Kindrei badu Juwis ado Jerusalem badeh, bandrek iy ta kasan ku-in bwe. ⁴Tasah iri lau rayah ta wasai ame bolo oro i buku nadu tine oro tiye anya, are lau anya kasahan lau ta Kindrei badeh, kasan ku-in. Arile winiyan bwe. Iri lau doh badeh, lalou, ya iri aton ame le ta anya kasilah manyah mwasin taha akohok udu bada Jises Kraiss. Tasah, manyah tataha ba-en hamon ta kandriyen malen bwe. Ma iri anya kamekes taha kasahan bonyo-ou ta kandriyen tiri Juwis. ⁵Iri aseken taha mara-ei ka-en hamon ta kandriyen tiri Juwis, arile aso banuhun se sahou ta nyala iri lau doh, bwai! Aso badeh, basekese ta sahou tiri doh bwe. Buku aso mene ka-en hamon tiri lau ta wasai doh badeh, sebwe sahou handru nane aso ndrasedhek ndrawek taha badeh, iu laleyah.

⁶Arile, oro tinan tiri lau ta Kindrei badu Jerusalem badeh, bamekes bala buku iri lau ta wasai doh bwe. Taha anya, oro tinan tiri lau ta Kindrei doh badeh, are bwele-en sese tiri lau rayah ja, arile Kindrei ja badeh, baso-ok oro lau tinan nane doh bwe. Iy ja badeh, banyolom oro ta lakou badu manan bwe. Eme ma, lakou laleyah ta budon tek, iri tinan deh bwe. Oro badeh, badeu sahou toro amwenen bala hawe sahou mwasin nane aso asehek ewek taha bwe, ⁷tasah, oro ndratanan Kindrei ndrasedhek lahou ndrasedhek kanik ta atiye sahou mwasin ili tiri lau badu leheleh. I le buku none iy mene atehi, i kani Pita atiye sahou mwasin, i tiri lau badu Juwis. ⁸Tasah, na boto-on ta Kindrei le jo asahan aposel

ta atiye sahou tan i tiri lau badu leheleh, i le buku none Pita mene asahan aposel ta atiye sahou tan i tiri Juwis. ⁹Eme Jemis, Pita hawe Jon badeh, oro lau ta batun dah, ndratanan Kindrei badeh, ndrastehei lahous dah ndrume kanik; eme, oro ndrasteu lim hawe aru Banabas. Eme, aso ndrastehek sahou randra le, ta aso amekes lahous le. Oro amekes lahous i bolo iri Juwis, ya aru Banabas amekes lahous i bolo iri lau badu leheleh. ¹⁰Sahous ari le oro tiye i buku doh, “Ado kabudon ta aseben iri lau tiri lakous bwe, are bolo aso dah.” Seben dah mene, jo aseken labai ta amekes ale.

Pol andres Pita udu kon Antiyok

¹¹Na len Pita eme asahan Antiyok badeh, jo asehek i bwilin amwenen, tasah iy bamekes lakous bamwenen bwe. ¹²Na len Jemis basuni oro lau rayah bala hawe Pita bwe le badeh, Pita aimon nyamon hawe iri lau badu leheleh. Arile udu, oro lau ta Jemis asahan ale, iy inoh ma iy ruwani ta aimon nyamon hawe oro lau badu leheleh. Eme iy baimon nyamon hawe oro ja bwe. Tasah, iy inoh oro Juwis doh, tiye tiri lau badu leheleh kasan ku-i iri bwena. ¹³Eme, oro nadu tine rayah badu Juwis anyolom Pita amekes badeh, ma oro an hamon tan amekes i le buku aliy. Oro tanan kandriyen doh bamwenen ta i bada nadu tine oro, iri lau badu leheleh, bwe. Ma Banabas ale tanan kandriyen doh bamwenen bwe, arile oro aluwi iy in hamon toro ale. ¹⁴Eme, jo anyolom oro ba-en hamon ta sahou handru ta sahou mwasin bwe. Eme jo tiye i ndranye Pita udu mada iri lau mari i buku doh, “Ou badeh, Juwis labai, arile manyah tam ndra buku iri lau badu leheleh. Eme ya ou bala Juwis bwe. Arile na dah, ou barandresei iri lau badu leheleh barakohok kandriyen tiri Juwis barala buku sah handru?”

Iri mwan ma badih atehei budon tiri handru in ta Kraises Jises, iri le doh kameh Kindrei aloh iri mwasin mara-ei ta madan

(Kalan 2:15–4:31)

Iri juwis hawe iri leheleh badeh, ado mwasin ta mada Kindrei i san ta budon handru

¹⁵Ya, jo asehek i ta Pita amwenen i buku doh, “Taha ndranye iri Juwis amwenen. Taha bala buku iri lau ta amekes kandriyen ndra-in i buku iri lau badu leheleh ala are baha tondrok ta kandriyen tataha Juwis bwe. ¹⁶Arile ndri-iy ai, ahi tanan labai, ta Kindrei aloh ndramak mwasin mara-ei ta madan badeh, i san ta budon handru le, i ta Jises Kraises; ba-en hamon ta batanau malen tiri Juwis, nane leheya kede-eh, bwe. Ma, taha

Juwis ale kasahan mwasin ta mada Kindrei i san ta budon handru le in ta Krai Jises, bala san ta a-en hamon ta batanau malen bwe. Tasah, ari ndramak badeh, winiyan bamwenen ta mada Kindrei i buku iy ki-in hamon ta batanau malen asehek, bwe. ¹⁷Taha anya kanone kasahan mwasin ta mada Kindrei i san ta taha ka-en hamon ta Krai ma taha kahakase hawen. Arile, i buku none taha kasahan ndramak ta karei ma lomondra ndra-in ta mada iri Juwis, i le buku none iri lau badu leheleh, idoh kameh moson ki buku sah? Jises badeh, suni taha amekes kandriyen ndra-in? Bwe! ¹⁸I buku jo anya katudun batanau malen mene jo ndratokosei ndra-au, badeh kameh, jo le nyowani jo ba-en hamon ta batanau malen handru bwe, ma jo kasahan i buku ndramak ta amekes kandriyen ndra-in ja.^b ¹⁹Tasah, jo tanan, i buku none jo anya kudu baha tondrok ta batanau malen le badeh, gok ta batanau malen le ta suni jo i san ta imek, ma jo ki buku iri lau ndramak. Arile, na dah, gok ta batanau malen doh kano ai. Ya jo badeh, ki hamon ja ta kandriyen mwasin ta mada Kindrei. ²⁰Jo mene imek hawe Krai udu bada kei tondreh tan, eme na dah, jo badek ba-en hamon ta so-ok tek le amwenen ja bwai, arile na len dah badeh, Krai manyah udu hawek ma jo edek in hamon ta so-ok tan. Handru, na len dah, jo manyah le na budon tek handru i ta Nadu Kindrei. Tasah, iy le tikisi jo, ma iy le akohok kon tek imek udu ta kei tondreh. ²¹Eme ma, jo winiyan bakahei tikisiy ta Kindrei bwai. Buku iri batanau mene Kindrei edeu ili tiri lau badu Isra-el, idoh winiyan sebenei taha ta mada sahou ta Kindrei hamon, buku handru eh, Jises winiyan bamak ta aseben taha bwe. Iy badeh, imek laleyah le. Arile, jo winiyan baruwanii kandriyen ta tikisiy ta Kindrei nane jo in hamon ta aliy bwai.” Eme ma, jo asehek nyala Pita ta aliy.

Kandriyen ta a-en hamon ta batanau ma kandriyen ta budon handru

3 ¹Aha mwan ma badih badu Galesiya, bale aha ndra-au! Are lau ndrawahei budon taha, ma aha ndra bale aha bwe? Jo mene udu hawe aha amwenen badeh, jo leheya aha aleu handru ta iri adai Jises Krai imek, udu bada kei tondreh. ²Eme jo anya ndremenya aha ta aliy, ma aso-ok aha badeh, kasehek kamwenen keme tek: Aha badeh, akohok Malawin Ndrabun ta Kindrei i san ta aha a-en hamon ta batanau malen deh? Bwe! Aha akohok Malawin Ndrabun i san ta aha anuhun, ma hawe i san ta budon taha handru ki ta sahou mwasin. ³I buku sah aha a bale aha bwe badeh? Aha bwena

^b (2:18) Lobohe dah badeh, sahou ta Pol baleu bame len mara-ei bwe. Nyolom ta aliy i buku iy anya kasehek, kudu bada len ta lau asahan lau ta Kindrei, iri bado baha kandriyen malen ja bwe. Arile, buku iri lau ta Kindrei rayah abadok labai, ta iri amwenen anya ka-en hamon ta kandriyen malen doh, iri kameh leheya buku iri badeh, lau ta karei ma lomondra ndra-in ale, i buku iri lau mara-ei ado ndra bahandra kandriyen malen. Ou anyolom udu bolo la-ukei ta Pol ili tiri lau badu Rom kalan 7:4-6.

mene amekes na Malawin Ndrabun ta Kindrei; ya idah ja kameh, aha anya kamekes na boto-on ta ndramak ai? ⁴Sebwe iri maha-an aha ndruniy udu bolo tekedek taha bwena mene, moson bwe nadeh? Bwe! Iri lakou doh moson udu aliy. ⁵Aha abudon i buku sah? Kindrei badeh, edeu Malawin Ndrabun ma amekes kalem udu ndrokowa aha. Sebwe iy edeu tasah aha an hamon ta batanau malen? Bwe! Idoh badeh, i san ta anuhun sahou ma hawe ta budon taha handru badeh, i ta sahou mwasin labai.

⁶Aha badeh, kalomondra tekedek ta Abraham se: I buku buk ndraban ndratiye,

“Abraham atehei budon tan handru in ta Kindrei, eme ma Kindrei aloh iy ndramak mwasin mara-ei ta madan.” *Jenesis 15:6*

⁷Eme ma, aha badeh, ndranyolom ma ndratanan ndramwenen ta lakou doh: Iri mwan ma badih nane atehei budon tiri handru in ta sahou ta Kindrei, iri doh badeh lundriye Abraham amwenen. ⁸Sahou ta Kindrei badeh, ndrasedhek ndra bwena, ta iy kameh aloh iri lau badu leheleh mwasin mara-ei ta madan i san ta budon handru le. Eme ma iy ndrasedhek ndra ta Abraham ta sahou mwasin ta Krai i buku doh,

“Na lundriyem oro le kameh, jo kameh edeu nyosowan i la-u iri lau mari badu munyak.” *Jenesis 12:3; 18:18; 22:18*

⁹Abraham atehei budon tan handru i ta Kindrei, ma Kindrei nyosowani iy; eme ma are lau oro atehei budon handru i le buku Abraham badeh, kameh i le buku aliy.

¹⁰Are lau oro abudon anya oro winiyan an hamon le ta batanau malen mari, eme ma Kindrei kameh sekese ta budon toro doh, badeh kameh oro akohok andra-i na len iri ales an ta mada sahou ta Kindrei. Tasah, ari ndramak winiyan ba-en hamon ta lakou mari batanau malen tiye iy kamekes, bwe. Idoh i buku le sahou ta Kindrei ndratiye,

“Are lau ba-en hamon ta lakou mari torowenei udu bolo buk ta batanau malen dah bwe, Kindrei le kameh edeu maha-an i tiri!”

Dutoronomi 27:26

¹¹Handru, aha winiyan anyolom sahou ta Kindrei tiye ale i buku doh,

“Are lau le atehei budon tan handru in ta Kindrei, Kindrei kameh aloh iy mwasin mara-ei ta madan, ma iy ndramak doh le winiyan akohok kohan ha-un ta udu le buku doh.” *Habakuk 2:4*

Eme ma taha ndratanan lakou dah: Ari mwan o badih sabudon anya iy winiyan in hamon ta batanau malen, ma na lahou tan doh iy winiyan akohok kohan ha-un ta udu le buku doh, ndri-iy. ¹²Arile, kati budon ta ndramak anya ki-in le hamon ta batanau malen badeh, bala buku none kati budon ta ndramak i san ta budon handru, bwe. Sahou ta Kindrei tiye i buku doh,

“Are lau le, iy in hamon ta lakou mari, batanau malen asehek, iy kameh akohok kohan ha-un ta udu le buku doh.” *Lebitikus 18:5*

¹³Arile, batanau malen le badeh, leheya taha buku taha winiyan bamen hamon ta lakou mara-ei batanau malen tiye, bwe, ya taha kakohok maha-an ta aliy. Arile, Kraisi badeh aseben taha, iy ndrakohehi taha mene ado bolo maha-an ta batanau malen ndrime len. Iy le ari badeh, ari kandriyen ndra-in bwe, arile iy akohok kon tataha bwese maha-an tataha; tasah sahou ta Kindrei tiye i buku doh,

“I buku, are lau atahi iy sukik udu bada kei ta kandriyen ndra-in tan badeh, iy udu bahandra maha-an ta Kindrei.” *Dutoronomi 21:23*

¹⁴Handru, Kraisi Jises badeh, ndrakohehi taha ma ndrakohehi taha ndrime hamon. Iy ndrimesekehi lakou doh, tasah iy anya katehehi nyosowan keme tataha lau mari. Idoh nyosowan Kindrei mene tandrakan i ta Abraham ki tiri lau badu leheleh. Ya taha akohok nyosowan doh i san ta Kraisi le ari. Eme ma, taha i san ta budon handru badeh, winiyan akohok boto-on ta Malawin Ndrabun mene Kindrei tandrakan.

**Batanau malen ta Kindrei badeh, winiyan
basakalawi tandrakan tan bwe**

¹⁵Aha nadu tine mwan ma badih, jo kameh asehek i buku none lakou taha anyolom na len mari kede-eh: Buku none ndrime la-uh amekes tandrakan ta amekes sahou randra le ta ari lakou, badeh sahou randra le doh abadok. Ari ndrime winiyan batubuniy bwe, ma winiyan badeu ari budon bala ta aliy bwe. ¹⁶Eme ma, udu bolo buk ndrime, Kindrei amekes i buku le aliy. Iy amekes iri tandrakan i ta Abraham hawe lundriyen oro. Sahou ta Kindrei batiye anya “toro lundriyem solo-an,” bwe. Badeh tiye,

“i ta lundriyem ari” le.

Jenesi 12:7; 13:15; 24:7

Ya iy doh badeh, Kraisi. ¹⁷Moson jo tiye badeh, i buku doh: Ma mwena mene Kindrei amekes sahou randra le, ma iy tandrakan ta iy winiyan bamaniy bwe. Ano udu hamon ta jaha ma hanek tonoh (430) iu, ma batanau malen tiri Juwis barasahan. Eme ma, batanau malen doh, winiyan batokosei sahou randra le bwe, ma winiyan basokosowehi tandrakan ta Kindrei amekes i ta Abraham bwena, bwe. ¹⁸I buku none seben ma manyah mwasin ta Kindrei badeh, sukik udu ta kandriyen ta a-en hamon ta batanau malen, taha bakohok bala san ta tandrakan tan mene bwe. Arile bwai, seben ta Kindrei hawe manyah mwasin tan, iy ndrimehehi ndra ta Abraham i san ta tikisiy ma tandrakan tan le.

¹⁹Ya, lahou ta batanau malen i buku sah bah? Kindrei mene aseken kati kandriyen ndra-in keme lewan. Eme ma, hamon ta iy edeu sahou tandrakan i ta Abraham, iy edeu batanau malen ale. Idoh ta leheya batanau malen doh boto-on ta aliy eme taku kabatana lundriye Abraham le barasahan. Ya ta lundriye Abraham le doh, Kindrei amekes sahou tandrakan i hawen. Ya lakou ari ja i buku doh, batanau malen mene

Kindrei atehei i kani iri angelo, ano iri angelo atehei i kani iri lau badu Isra-el. ²⁰Arile, na len Kindrei amekes sahou tandrakan i ta Abraham iy ba-en hamon ta kandriyen doh bwe. Kindrei le ari asehek sahou amwenen i ta Abraham, ma amekes sahou tandrakan hawen. Eme ma, sahou tandrakan doh badeh, lakou laba tinan labai ja, ma sakalawi batanau malen mari ta Moses.

Lahou ta batanau malen tiyani taha ala hawe Kraiss

²¹Idoh badeh, ma mesekei batanau malen badek se hawe tandrakan ta Kindrei bwai? Bwe labai! I buku none batanau malen mene ndrastehei winiyan edeu kohan ha-un ma mesekei lau manyah mwasin, badeh Kindrei winiyan aloh iri lau mwasin mara-ei ta madan na san ta batanau malen le. ²²Arile bwai! Sahou ta Kindrei ndratiye anya lau mwan ma badih badu kon munyak mara-ei badeh, ado bolo kowah ta karei ma lomondra ndra-in. Kindrei le alelei lakou doh asahan tasah, iy anya katehei nyosowan mwasin tan mene iy tandrakan badeh, ki tiri lau heh atehei budon tiri handru in ta Jises Kraiss.

²³Ma mwena badeh, budon handru basahan bwe le, batanau malen turuki taha i buku none lau are bolo kou, winiya le, budon handru asahan eme lewan. ²⁴Handru labai. Kraiss bame bwe le badeh, taha are ndra bahandra tondrok ta batanau malen. Ya lahou ta batanau malen doh ta tiyani taha ala hawe Kraiss, ta taha katehei budon tataha handru ki tan, eme ma Kindrei winiyan aloh taha mwasin mara-ei ta madan. ²⁵Eme na len dah, budon handru ndrasahan ai, ya batanau malen winiyan batondrok taha ja bwe.

²⁶Aha mari atehei budon taha handru in ta Kraiss Jises. Ya, na kandriyen doh, aha asahan nadu Kindrei, ma aha ahas hawe Kraiss. ²⁷Aha ndralomwa, ma aha ndralla le se hawe Kraiss, eme ma aha ndrakohek kandriyen ta Kraiss. ²⁸Eme ma, iri lau badu hawe Kraiss badeh, iri Juwis, iri lau badu leheleh, iri bonyo-ou ma iri bonyo-ou bwe, ma hawe iri mwan ma iri badih badeh, ari bala randrah, ari bala randrah ja bwe. Iri mara-ei doh badeh, asahan ari buruwen hawe Kraiss le ari. ²⁹Ya, buku none aha badu hawe Kraiss handru, badeh, aha nadu Abraham ai. Ma idah kameh, aha akohok kohan ha-un ma manyah mwasin mene Kindrei tandrakan ta aliy.

Ta lahou ta Kraiss le badeh, taha lohowan tan asahan nadu Kindrei

4 ¹Ya, kandriyen tataha ari badeh, i buku sahou sokek ta amekes moso sahou jo atorou dah kaleu kamwenen. Buku ndramak ari munyak tan ranah laba tinan udu aliy, ya, buku iy ndramak doh, nadun mwan ari udu aliy. Nadun amwenen badeh, ibo gok udu bwele-e munyak doh, luluwen labai i buku ari bonyo-ou. Udu hamon, buku taman

anyolom nadun ndrasahan awas handru, iy kameh winiyan tiye nadun ta atondrok munyak tan doh. ²Tasah, iy mene ma bwisik badeh, iy in hamon ta sahou tiri lau ta atondrok iy, ma iy i buku ndramak ari laleyah ta gok le, winiya na len le taman barasan ben tan. ³Eme ma, nadu sahou sokek jo nane torowenei dah badeh, moson ta aliy i buku doh: I buku taha mene are ndra buku iri nah bwisik badeh, ta budon tataha, ma taha mene a buku bonyo-ou, tasah kandriyen ma batanau solo-an nane badu bolo munyak atondrok taha. ⁴Eme na len ta aliy amwenen asahan, Kindrei suni nadun amwenen eme. Iy asahan eme len ta badih awas eme udu baha kandriyen ma batanau malen tiri lau badu Juwis. ⁵Ya, Jises eme akunoh taha are bahandra batanau malen tiri bonyo-ou tiri Juwis ame len, ma taha asahan nadu Kindrei. Eme ma, na len dah ja badeh, taha ndrasahan ndra tinan, ma taha winiyan akohok ma atondrok iri lakou mwasin nane tama taha ndratchehei ndrache tataha nadun amwenen.

⁶Eme ma Kindrei suni Malawin Mwasin ta nadun Jises eme udu ndrache tataha ari ari, tasah taha ndrasahan nadun. Eme ma iy bwidi taha aloh i ta Kindrei i buku doh, “Tama, tama.” ⁷Eme ma, taha badeh, bado buku nadu Kindrei nyandren, buku bonyo-ou tan ja bwe, tasah taha ndrasahan ndra tinan ndra en, ma Kindrei ndratchehei kalem ndrache tataha ta akohok manyah mwasin doh, hamon.

Pol abudon iri lau badu kon Galesiya

⁸Bwena mene ndra-au, aha tana aha Kindrei bwe. Eme aha a bonyo-ou tiri kindrei rayah ja; iri doh badeh, Kindrei handru bwe. ⁹Arile, na dah, aha ndratche aha Kindrei handru. O, sebwe jo katiye taha ki buku doh: Kindrei ndratche aha. Ya, i buku sah ja, aha anya kala hamon ja kala hawe iri malawin ndra-in ja? Iri nyamu iri bwe, ma iri winiyan bala ari lakou handru bwe. I buku sah, aha anya kala bonyo-ou tiri ja? ¹⁰Aha atehi budon taha ihis ta kandriyen tiri Juwis ta len, ta bun, ma jaha, ma hawe len ta ur ma an. ¹¹Eme ya jo abudon aha solo-an labai. Sebwe, boto-on ta lahau tek ewek taha badeh, iu laleyah?

¹²Aha nadu tine, jo aseken aha kanuhun sahou tek. Jo badu hawe iri Isra-el, arile batanau malen tahi badeh, bateu jo bareu bolo kou ja bwai. Eme ma na dah, jo udu bahandra maha-an ta aliy eme len, ma jo udu laleyah buku aha lau badu leheleh amwenen. Arile, nadah ja, aha anya kala bahandra tondrok ta batanau malen ja. Kora-on aha kala bolo kou ta kandriyen taha nane doh. Ndri-iy ai. Aha ka-en hamon tek, buku jo ki-in hamon ta Krai. Aha bamekes ari budon ndra-in bame badak bwe. ¹³Aha ndratche aha, ma mwena handru mene jo atiy sahou mwasin ewek taha badeh, sik le sahei, ma jo asehek sahou ta Kindrei mwasin ewek taha. ¹⁴Ya eme sik tek badeh,

ndra-in labai, arile aha basumukok jo bwe. Handru, aha nyowo-ei jo, i buku none angelo ta Kindrei badu loken; ya, i buku none Jises Kraiskeme i buku none jo dah, sebwe aha kandrei iy, ki le buku jo nadeh? ¹⁵Aha mene sekese handru ta kandriyen mene jo ndramesekes. Eme na dah ja, saba lakou ndramesekei aha? Bwena mene, aha winiyan basook jo kameh imeson o barah ta ari lakou bwe-en. Na bolo len bwena mene doh, aha winiyan sekese ta aha sudi mada aha amwenen, ma atehei eme tek, ta aseben jo. ¹⁶Ya jo asehek sahou handru. Aha abudon anya, jo dah budon tek ndra-in i bada aha, tasah jo atiye sahou handru dah?

¹⁷Iri lau rayah aseken labai ta anyu kaliu budon taha ki hawe budon tiri ja, arile budon tiri badeh, ndra-in. Iri anyu kamosokok aha same hawek. Eme iri anyu kaliu budon taha ki hawe budon tiri ta aseben ma atudun iri le. ¹⁸Ya, i buku none jo udu hawe aha, deh, jo bado hawe aha bwe, mwasin, aha kamekes lahou mwasin le kili. Ma, i buku kati budon taha ta amekes lahou amwenen, aha katehei budon taha handru na len mari kihis ta lahou doh. ¹⁹Eme ya, aha naduk, jo atona isi, ma jo tikisi aha laba tinan labai, i buku isi ta badih anyu kedeu nah udu ndrinen eme len. Tasah, len mari jo tikisiy ma abudon aha, ma atondrok kandriyen ta Kraisk handru barawek ndrinen aha. ²⁰Jo badeh, aso-ok labai ta udu hawe aha, arile jo udu len labai. Buku jo kudu hawe aha, badeh, kameh jo winiyan seleyani aha, ta iri saba lakou handru, i nyara kati maha-an asahan taha badeh, ma jo ale winiyan asehek iri sahou rayah ja. Arile, na len dah badeh, jo anyu kasehek boto-on kewek taha, ta maha-an tinan labai udu bweleek, eme ma jo atorou la-ukei ramen dah ewek taha ta aliy.

I buku none Haga uru Sara

²¹Jo anyu katiye taha, ta are lau oro anyu ka-en hamon ta batanau malen tahi lau badu Isra-el: Aha banuhun batanau malen tiye i buku sah bwe le? ²²Udu bolo buk ndrabin ndratorowenei i buku doh: Abraham nadun mwan ma la-uh. Iy ari, asahan ta udun amwenen Sara, ya iy ari, asahan ta lohowan tan Haga. ²³Eme, nah badu ndrinen lohowan tan, adeu iy eme len i buku none iri adeu nah eme len kede-eh. Arile, i nah ta udun handru, adeu iy eme len in hamon le ta tandrakan ta Kindrei. ²⁴Eme budon dah, moson asahan i la-uh. Uru badih ma la-uh leheya sahou lundra. Nadu Haga oro, sahou randra le, badeh, ari ai. Ya oro badu mandrei Sainai, atehei oro ta asahan bonyo-ou. ²⁵Haga badeh, moson i buku mandrei Sainai udu bolo kon Arabiya. Eme, kandriyen ta bonyo-ou badu ta Haga ndrime Jerusalem na dah, tasah iy ma hawe lundriyen oro badeh, bonyo-ou kahis le. ²⁶Arile, Jerusalem badu kandrah badeh,

kon tiri bonyo-ou bwe. Iy doh, tine taha mari.^c 27Tasah, tarou ta Kindrei badeh, tiye i buku doh:

“Ou badih kis badeh, ou sekeseke,
ou sarakau ma ou sandroh,
ou mene batona isi ta nah bwe.

Tasah, badih udun ruwani iy kameh nadun i sola,
sakalau badih udun udu aliy ja.”

Aisaya 54:1

28Eme, aha nadu tine, aha badeh, nadu Kindrei i hamon ta tandrakan i le buku Aisik. 29Eme na len doh mene, nah adeu iy eme len i buku nah mari kede-eh, kameh, iy edeu sisi-in i ta nah asahan na boto-on ta Malawin Ndrabun. Ya na dah i buku aliy le. 30Arile, sahou bolo buk ndraban tiye i buku doh,

“Ou tikahei badih ta bonyo-ou ma nadun uru ka-au. Tasah, nadu badih ta bonyo-ou kameh, winiyan bakohok se lakou badu mine taman bwe. Nah le badu ndrane udun amwenen badeh, bonyo-ou bwe. Iy kameh akohok lakou mari.”

Jenesis 21:10

31Eme, aha nadu tine, taha badeh, lundriye badih ta bonyo-ou bwe. Taha bonyo-ou bwe, taha badeh, lundriye udu Abraham ta badih bwena labai, eme ma taha ado mwasin ai.

Krais mene konohei taha ame len are laleyah, ano Malawin Ndrabun badeh, sariye taha ta adek, eme ma bwidi taha amekes kandriyen mwasin labai i tiri lau rayah ja

(Kalan 5–6)

Ado katondrok manyah tado kudu mwasin

5 1Taha ado mwasin na dah, tasah Krais kuhi taha, ado bahandra batanau malen ame len. Eme ya aha badeh, kabadok aha, ta aha sala bonyo-ou sala baha maha-an ta batanau malen ja.

2Aha kanuhun, jo Pol amwenen tiye taha dah: I buku ado anya ka-en hamon ta batanau malen tiri Juwis ta asan ku-i ado, badeh, Krais kameh

^c (4:25-26) Nadu Haga hawe nadu Sara oro doh badeh, leheya buku oro lau badu boho kamen lu-em. Lundriye Haga oro badeh, i buku iri Juwis mene are bahandra mandrei Sainai. Kabatana Moses mene edeu kandriyen malen ta atondrok iri, iri ale badeh, ado buku bonyo-ou ado bahandra kandriyen malen nane doh. Ma iri badeh, ado ndra buku doh kahis. Arile, lundriye Sara oro badeh, bado buku iri bonyo-ou ja bwe. Sara hawe lundriyen oro badeh, andrei ma atehi budon toro mara-ei in hamon ta tandrakan ta Kindrei. Ou anyolom udu ta tarou ta Jenesis kalan 17:16-21; 18:10-14 ma 21:1. Ma iri anya kakohok kohan handru udu Jerusalem badu kandrah. Nadu Sara Aisik asahan badeh, i san ta tandrakan Kindrei edeu i tan. Ou anyolom udu bolo la-ukei ta Pol atorou ili tiri lau badu Galesiya kalan 4:28.

winiyan baseben ado se bwe. ³Tasah, jo tiye sahou ndraleu ndrawek taha! Buku aha a-en hamon ta ari batanau malen badu Juwis, i buku ta asan ku-i aha, badeh, aha ka-en hamon ta batanau malen mara-ei tiri Juwis ale. ⁴Buku aha anya ka-en hamon ta batanau malen, ya, na san doh aha abudon Kindrei winiyan aloh aha mwasin mara-ei ta madan, aha ndrandra-i kede-eh! Aha winiyan bwe! Arile, ta kandriyen doh badeh, aha ndrastehei kona aha badeh, ndrala ta tikisiy ta Kindrei, ma ta kandriyen ta Jises Kraiss mene imek udu ta kei tondreh, ta aseben taha mwan ma badih marakon. ⁵Arile, Malawin Ndrabun ta Kindrei badeh, ibo gok ta amekes budon tahi mara-ei kabadok, na len ahi atondrok manyah mwasin ta Kindrei hamon doh. Ma Kraiss kameh amekes ahi asahan amwenen handru i le buku iy. ⁶Ma, Kraiss badeh, aso-ok taha labai, eme ma taha aso-ok iy ma a-en hamon tan. I buku ari ndramak iy anya kisan ku-in, o bwe, idoh lakou laleyah. Lakou laba tinan badeh, i buku doh: Taha badeh, katehei budon tataha handru ki-in le ta Kraiss, tasah taha badeh, aso-ok iy tinan labai.

⁷Aha mene an hamon ta kandriyen ta Kraiss ma aha sakaliye mwasin labai. Ya, are lau handru eme sokei san taha, ma tiye aha tebelese i ta sahou handru? I buku sah iy aruwi aha? ⁸Kandriyen ta andrek badeh, bare boho Kindrei aloh ado mene bwe. ⁹Aha tana aha kandriyen ta andres badeh, i buku yis. Iri atehei sese le, arile winiyan abe-ei jabi ramen mara-ei. ¹⁰Arile, taha badeh, ahas hawe Kraiss, eme budon tek ndrabadok ndrala ta Laban, ta aha winiyan bakohok budon ari ja bwe. Eme ma, are lau oro wendreya aha kameh bwese maha-an ta aliy.

¹¹Aha nadu tine, buku jo amekes sahou ta leheya aha lau mwan ma badih ta Kindrei ka-en hamon ta batanau malen tiri Juwis ta asan ku-i aha; iri Juwis kameh winiyan bamekes kandriyen ta bokoro-ei jo bwe. Arile, jo baleheya aha bala buku badeh, bwe. Eme ma iri abo gok ta bokoro-ei jo le ai. Ma ndrine iri badeh, irih tek kahis, tasah jo badeh, asehek ta nyala kei tondreh mene iri tatahi Jises Kraiss udu aliy. ¹²Ya, i buku none iri rayah kandres labai ta kasan ku-i iri, jo anya, mwasin labai ta oro doh, kasani ku-i oro mari ki-iu!

¹³Ya, aha nadu tine, aha ndrasahan mwasin, tasah Kindrei ndraluhi aha ndrime len ta batanau malen tiri Juwis. Arile, aha salelei kandriyen mwasin doh samesekei aha sa-en hamon ta budon ta bada aha badu munyak. Arile, kandriyen ta tikisiy badeh, kamesekei aha kaseben aha ari, ari. ¹⁴Tasah, batanau malen mari eme bahandra batanau ari le:

“Ou aseken iri lau ari ari badu hawem, i le buku ou aso-ok ou le.”

Lebitikus 19:18

¹⁵Arile, i buku none aha anya ka buku mwi amekes isi i tiri ari ari, bale aha kudu aliy. Idah kameh aha bokoro-ei ndrokowa aha, ma aha andra-i mara-ei.

Manyah na kandriyen ta Malawin Ndrabun

¹⁶Eme ma, jo asehek i buku doh: Aha kalelei Malawin Ndrabun katondrok manyah ma kandriyen taha, ya, i buku aha amekes eh, aha winiyan ba-en hamon ta seken ta kandriyen ta bada aha ja bwe. ¹⁷Tasah, so-ok ma kandriyen ta bada taha i randrah labai, bala buku none so-ok ma kandriyen ta Malawin Ndrabun bwe. Uru ma la-uh doh winiyan badek se bwe. Eme ma, iri lakou aha anya kamekes, aha winiyan bamekes bwe. ¹⁸Arile, i buku none aha a-en hamon ta Malawin Ndrabun eh, badeh, aha ba-en baha batanau malen bwai.

¹⁹Kandriyen ta bada taha badeh, i buku doh: Kandriyen ta karei i buku mwi, kandriyen ndra-in ta sumukok; ²⁰kandriyen ta adeu budon i ta sukumada kei i nyara Kindrei, ya kandriyen ta kau hawe omor lau; ya kandriyen ta budon ndra-in ta losen hawe sobobo; ya hawe kandriyen ta madalakis; hawe ndramak ndrinen ndra, ma hawe kandriyen ta ndrakok. Ya kandriyen ta amekes iri lau atalan, rayah ka len, ya rayah ka len; ²¹Iri kandriyen i buku madalakis ta lakou, ma hawe a-un gwa boto-on ta amekes lau abo lolo-ou, ma ta amekes lakou laleyah. Jo tiye sahou batanau i taha dah, i buku bwena jo ndrasehek taha: Oro are lau amekes kandriyen doh, winiyan bado bahandra tondrok ta Kindrei bwe.

²²Arile, Malawin Ndrabun badeh, edeu kandriyen ta tikisiy, kandriyen ta sekese, kandriyen ta amekes mondrei, kandriyen ta bohon bwe, kandriyen ta aseben, kandriyen mwasin hawe kandriyen ta amekes lahou mwasin ta budon tan handru, ²³kandriyen ta ou amekes ou batudun ou bwe, ma hawe kandriyen ta budon tam winiyan bandra-i bwe. Ya eme ari batanau malen winiyan baturuki iri kandriyen doh bwe. ²⁴Eme, are lau oro badu hawe Jises Krai badeh, ndrasani san ta kandriyen ta bada oro satondrok oro. Idoh i le buku oro ndratahi so-ok ndra-in ta bada oro kimek ki-in bada kei tondreh. ²⁵Malawin Ndrabun edeu kohan handru eme tataha; eme ma taha kalelei iy katondrok bolo tekedek tataha. ²⁶Taha sabudon anya taha ndra ari ai, bwe. Ma taha sasakalau ndramak ari ari, ma hawe mada taha salikis ndramak ari ja.

Ado badeh kabwese maha-an tado ari ari

6 ¹Aha nadu tine mwan ma badih, ki buku none aha ari kamekes kandriyen ndra-in, aha are an hamon ta Malawin Ndrabun badeh, kaleheya iy kasahan ta budon mwasin i san ta manamun; arile, bale aha ale ki-in taha, kora-on aha kataku ja. ²Aha badeh, kabwese maha-an ta nadu tine aha ari ja. Ya i buku none aha kamekes kandriyen doh, aha an hamon ta kandriyen ta Krai. ³I buku none ari ndramak anya kasakau anya, iy le ai, iy le amwenen kameh wendreyani iy. ⁴Ndramak ari ari kanyolom kandriyen tan kamwenen labai. Ya, i buku none kandriyen

tan mwasin, iy le kasekesek ta lakou mwasin nane, iy amekes. Ya, iy sanyolom iy sala ta lakou, ndramak ari ja amekes. ⁵Tasah, ndramak ari ari kameh, bwese maha-an ta kandriyen tan amwenen.

⁶Are lau akohok tanan ta ndramak ta leheya iy na sahou ta Krai, mwasin ta iy kaseben ndramak ta leheya tan na lakou mwasin tan.

⁷Aha sawasai aha le; ma aha sabudon anya, aha winiyan wahei Kindrei, ndri-iy labai. Tasah, ndramak ari ari kameh, bwese maha-an tan amwenen in hamon ta lakou iy amekes. Idoh handru, tasah taha tanan, saba nyamon taha atah kameh, taha akohok sali nyamon doh amwenen.

⁸Are lau anya ki-in hamon ta kandriyen ndra-in badu badan, iy kameh akohok kunoh ma imek ta aliy; arile, are lau anya ki-in hamon ta Malawin Mwasin ta Kindrei, ma amekes iri kandriyen mwasin le, eme ma Malawin Mwasin le kameh winiyan edeu kohan handru ta udu le buku doh. ⁹Eme ya, taha sawoyah ta amekes kandriyen mwasin; ya, i buku none taha baruwanii bwe, badeh kameh, taha akohok ndramas ta aliy na len hamon. Idoh i buku ndramak ta bilin akohok sali nyamon ta lahou boto-on mene iy amekes. ¹⁰Eme ma, na madasan mari Kindrei sihiy, taha kamekes kandriyen mwasin ki ta lau mari. Arile, ma hutuwen badeh, i toro lau ta Kindrei le, ala budon toro ihis handru.

Sendrehendreh ta sahou batanau hawe sahou sekesekek

¹¹La-ukei dah mirihik ano ai. Aha ndranyolom tarou laba tinan jo atorou na minek amwenen aleu ewek taha. Jo aseken aha kanyolom ma kanuhun kamwenen sendrehendreh ta sahou batanau jo amwenen atorou ewek taha dah! ¹²Iri lau doh badeh, abadok labai ta asan ku-i aha, iri kameh amekes i buku doh, tasah iri aso-ok nyara iri kasahan ki tinan ta ndranye iri, ma mada iri lau rayah ja. Iri ale badeh, anoh ma abudon i buku doh, “Kora-on iri lau rayah ja katanan, buku to badeh, atehei budon tato mara-ei in ta kei tondreh ta Krai, ma kora-on iri anya kamekes ndra-in keme tato.” ¹³Handru, iri asan ku-i iri; arile iri ba-en hamon handru ta batanau malen bwe. Ya iri anya, aha kasan ku-i aha, ta amekes anya iri le ai, tasah aha badeh, ndra-en hamon ta budon tiri. ¹⁴Arile, jo le, jo winiyan batudun nyarak o nyara ndramak ari ja bwe. Jo kamasiye kei tondreh ta Laban tataha Jises Krai le. Tasah iy le imek udu bada kei tondreh tan. Ya, na lahou iy amekes doh, boto-on tiri kandriyen mari badu munyak badeh, ndramak ale udu budon tek. Ya, idoh ale, i buku jo imek udu bada kei tondreh hawen, eme ma jo winiyan ba-en hamon ta kandriyen badu munyak ja bwe. ¹⁵Eme nadah, ari katin bwe, ki buku none asan ku-i taha, o, i buku none basan bwe; arile katin handru i buku doh: Ta ndramak badeh, kasahan ha-un. ¹⁶Ya, are lau oro an hamon ta kandriyen doh, mondrei ma tikisiy kudu hawe oro mara-ei. Oro le badeh, Isra-el handru ta Kindrei.

¹⁷Ya ta sendrehendreh ta aliy i buku doh: Ari ndramak badeh, sadeu jo sala bolo maha-an ma sisi-in ja, tasah jo bwese ndrana udu badak dah ta leheya jo badeh, lohowan ta Jises.

¹⁸Ya eme aha nadu tine mwan ma badih, tikisiy ta Laban Jises Kraiss kudu hawe malawi aha mari. Handru!